

Ab altero die sabbati septem ebdomadas plenas numerare nobis lege praecipitur usque ad alteram diem expletionis ebdomadae septimae, id est quinquagesimum diem, in quo primiciae offeruntur. Quae dinumeracio perfectionis plenae per septenarium et quinquagenarium numerum et decem quinquies efficitur. In quo hoc significari puto, ut per quinquagenarium, qui remissionem in se continet, per caritatem, quae, septiformis spiritus gratia superveniente, diffusa est in cordibus nostris, et quinque nostri corporis sensus legi Dei subditos habeamus, quae verba decalogi in se continet, et per caritatem, ut dixi, quae caritas operit multitudinem peccatorum. Et sic sacrificium novum Domino ex omnibus habitationibus nostris in usum magni sacerdotis cum pacificis nostris victimis credentes¹⁾ offeremus, sicut Domino pacem fecerimus, offerentes spirituales hostias acceptabiles Deo per Iesum Christum, qui panes primiciarum terrae nostrae etsi fermentatos, tamen sibi consecratos comedit. Ipse pontifex, qui caelum penetrans, possit compati infirmitatibus nostris et, cum apud Patrem advocatum habeamus eum, opera, quae fermento fragilitatis nostrae fermentata in husum huius sacerdotis manu operationis elevata cedent per viscera misericordiae, devorat. Quae non odorem Deo suavitatis praebent, sed magis indulgentiam exigunt.

In fine anni solaris apud Hebreos, id est septimo mense, quando congregantur fructus in horrea sive in cellaria, tunc celebrare lege praeceptum, id est prima die tubarum, decima die expiationum celebrari debere sabbata, et a quinto decimo die per dies VII^{tem}, usque dum finiantur octavo, tabernaculorum feriae esse praecipiuntur. His autem fortasse significari potest, ut, quia nos in fine saeculi trino sacramento invocationis sumus consecrati, tuba praedicationis, euangelii fide et aspersione sanguinis Iesu Christi, in qua vera propitiatio est, finito legis tempore, discere non cessemus, et congregatis novis bonorum operum fructibus, ab omni opere malo quieti, per septiformis spiritus gratiam perfectione suscepta, in octavae beatitudinis numeros pervenire mereamur. Quod tamen et per ieiunii et orationis labores non est dubium consequi, quia et affligi anima lege praecipitur.

In neomenia bucinare tuba praecipitur, id est nova luna, quia qui luna scientiae illuminatus est, praedicare aliis cessare non debet. Quod Paulus scientiae Christi fulgore illuminatus observare minime contempsit, praedicans in synagogis Iudeorum.

De sacrificiis²⁾ pauca dicere decreveram, quae cum hostiae veri pontificis in se figuram contineant, a nobis etiam Domino spiritaliter offerri debent. Per vitulum enim labor noster, per ovem innocencia, per hircum mortificatio fornicariae voluptatis, per capram, quae in sublimi pastu pascitur, vita theorica, per

1) 'cedentes' cod.

2) Cf. Levit. 1. 2.